

全華叢書



宋學士全集卷之三十

明宋濂撰

同郡後學胡鳳丹月樵校梓

贊

文右相像贊

才優德純山峙玉溫重厚可以鎮俗仁恕足以澤民
或陳經術而侍青坊或秉霜簡而立紫宸終受知於
聖主宅右揆而相秦深沈有謀真潞國之裔剛毅忠
信誠絳侯之倫觀其屹立不動正笏垂紳猶可作懦
夫之氣而禡邪佞之魂嗚呼此所謂邦家之重寶廊

廟之大臣也歟

婁貞公贊

原武婁宗仁當天后政嚴之時獨以寬厚聞其弟守代州宗仁教以唾面自乾至今爲善者師焉因贊之以自勗贊曰

我言之恍斯辱之招我行弗足或貽其辱二者無失其至由外內省不疚我則何罪我面彼唾乃彼之愆我何潔之正使自乾孰忍自乘攘袂而鬩孰量之弘受詬如頌是非苟繆不亦殆而微公之師吾誰與歸

陸秀夫像贊

身抱龍髯兮眼不見水鳳闕雖遐兮龍堂則邇玉雪
皦如兮肯污泥滓赤日出海兮爾心不死

滕奉使贊

齊人王蠋有言曰忠臣不事二君烈女不更二夫女
之從人一與之醮當終身不改譬之白璧小有玷辱
人將斥去而不之顧臣之事君也其理亦同故蠋特
並言之事兩夫者雖辨如虞姬智如鄧曼吾知其決
非良婦事二君者雖功如汾陽才如西平吾知其決

非良臣嗚呼使此義昭如白日人臣安肯懷二心而國安有喪亡之禍哉東陽滕茂實當宋靖康初以太學正與僉書路允迪奉使於金議割三鎮太原尋奉密詔據城不下金人怒囚之雲中欽宗北遷茂實獨見涕泣請從行主者不之許其後允迪南歸茂實獨留雁門終身不再仕臨沒令以黃幡裹屍而葬仍刻石識云宋使者東陽滕茂實墓此殆不事二君者歟當是時有宇文虛中者亦以黃門侍郎使金見留遂改節易行反面事狄其後雖欲奪兵仗南奔而自贖

卒亦不逃君子之譏其視吾茂實果何如也茂實已
矣人至今想其遺節如神龍不可得見至視虛中輩
不啻若鬼蜮犬豕有識妾婦亦羞聞之此無他人心
天理終不可誣也乃作滕奉使贊用規事君而有二
心者贊曰

漢有蘇武奉使不屈滕公配之有聲烈烈黃幡裏屍
以全臣節如璧之白弗緇弗缺其人雖亡精神不滅
上遊帝所凌厲日月降臣見之肝碎膽裂敢述贊辭
勒在貞碣

東陽十孝子贊

十孝子者皆東陽人其事載於郡乘爲詳予讀書之暇因探其昊天罔極之思而爲是贊以風世之爲人子者

秦顏烏

烏傷人

古有醇孝厥姓惟顏父喪未葬行泣道間我畚我鍤是藶是瘞彼羣烏何知銜土予助我冢旣封烏吻血流感爾異類愧我同儔秦風日滴借耰鉏而德色誰意露雲之四蒙見此皦日千載之下禮憲淪胥豈獨

愧君烏亦不如
有廟嚴嚴春秋是祀
用興薄夫作孝子

吳斯敦 東陽人

有孝者斯峴山之阿
父罪當誅兒心奈何
自非吾親盍從生我
我寧隕身父死其可
九關戕戕虎豹齧齧
瀝血上書願易以身
王用爾恤卒全父命
更旌爾門風彼不令
池波齋淪宰木扶疎
清風肅然過者下車

晉許孜 東陽人

嗟嗟許生實孝於親
胡風木不停遘此難
屯輶車旣

載負土築墳我親我塋敢曰勤彼鄉民手胼足胝我不爲辛巾笥猶存几筵不改惕然念之吾親何在秋霜凝凝春雨濺濺父兮母兮得無苦寒與饑兒旣不可見寧不念茲天高可極此情罔極鹿獨不閔我觸我松柏嗟嗟許生厲志不移終身之慕於子見之

唐馮子華

東陽人

緬彼孝馮縮廬墓傍思親不見欲與俱亡白日寥寥悲風四起蒲伏號呼哀徹心髓天錫嘉瑞慰我孝思有皦斯兔有爚斯芝孝馮曰噫吾焉用汝九京莫興

百瑞奚補唯爾孝子樹我世防雖歷萬祀厥德彌章
自公之亡肖公者幾茫茫堪輿孰非人子

唐應先

東陽人

卓哉至行眾人所難眷我應君拔涕沈瀾親之云亡
中心咽塞雖草生髮閒何暇束櫛昔處膝下其樂泱
泱今我來思舉目但見白楊彼蒼者天曷不我惻苟
可從之我生奚恤爾心之苦爾行之優雙闕峨峨卒
承天休

唐唐君佑

東陽人

唐氏之子以孝行聞死生一節弗歧弗分唯思親不
置鞠明究曠誰無父母以樂以愉今我何罪獨行次
且我罪之深我宜隕墜胡獨使我親先彼朝露昊天
不弔直至於斯渺渺音容如何弗思官用褒旌封報
在舍匪私爾一人式勸來者

陳太竭

浦江人

浦汭之間有氏曰陳親沒居廬衰麻終身心斃形瘵
杖而後起一氣如絲去死無幾朝哭如吞莫哭尤不
忍聞松風翛翛林鳥嚶嚶來助予之悲號遐思弗寧

起奠我爵果肴在前烏鳥爲之不啄世瀦失防頽彼
滉瀆我思古人古人焉往

宋董少舒

蘭溪人

有倬董君父以令終躬負厥土馬鬣其封四郊無人
夜寒如水黑飈潛興如臨神鬼董君出廬擁墳撫膺
念父寥寂長哀無聲日兮月兮能照下土寧不閔我
最苦願亟入九泉奉我父母靈芝煌煌駿發爾祥蓋
紫榦黃於燦其光有焯董君德聲斯不亡

宋金景文

蘭溪人

激水之州三山之坡下有孝子孝如之何父疾在首
顛天請代願萃子身我親罔害母棺未窆執纒以前
天光下燭五色粲然五色粲然未足爲偉怪電獰風
勿犯其里苟匪中忱曷以臻此繇代是師於戲孝子

宋賈南金

金華人

孝道之弘百行所生誰與賈氏實敦古風生弗離親
沒安可棄忍令親之玉體爲泉扃所閤晝雖不可見
接以夢寐夢中相見宛其未死覺後求之寒燈在几
得不慨茲潛潛墮淚睠爾孝德閱我章逢梔蠟其貌

黼黻其躬父子相軋或不相容我述贊辭用發民衷

許魯齋先生贊

濂洛之學傳自武夷重徽疊照日星昭垂逮我許公
尊聞行知若親摳衣寒泉之糜張皇幽眇釐析毫絲
如皋陶淑問畢其情辭如后羿注矢不失其馳既入
闔域遂升堂基橫經冑監衿佩鏘如祛其人私隔其
天彝釋其偏歧挽其九衢德成財達昭用如時黼黻
帝治甄陶泰熙明體適用公實庶幾無德弗報四海
祝尸嗚呼許公百世之師

劉靜修先生贊

先生之心嶽鎮川澄先生之操玉溫石貞先生之學
寤寐六經岐陽之鳳魯郊之麟和氣襲人盎然陽春
發周孔性情悒其深醇或出或潛與道周旋九原可
作吾爲執鞭

吳草廬先生贊

紫氣蟬聯神物蜿蜒有開必先山川降神自元而貞
篤生哲人慎斯勤斯絕乎等夷於道早知厲如秋霜
煦如春陽何德之昌抱膝而居氣蓋八區闕而弗舒

玩心神明操觚弗停輿衛聖經學徒是依毛之有麒
甲之有龜麋其淵冲以消吝封心熙氣融聖王當軒
留聘益尊施教成均北許南吳先後合符人文之敷
大明太史金華宋濂贊

虞文靖公像贊

朱明之墟離火降精也丹鳥襜褕爲駕綵輅也手握
化樞人文昭明也補帝衮衣五色熒熒也上凌霄漢
下燭九溟也無幽不啓無芳不榮也頓挫萬彙配合
三靈也獨騎元氣棲神窈冥也之死弗沒隨物流形

也凝爲喬雲燦爲德星也琬琰所勒鬼祕神扁也命
世之材一代之英也

先師內翰柳公眞贊

偉貌長身端嚴若神卽而就之煦然春溫海濶天高
莫窺覘其宏度霆奔飈豎壹驅駕乎雄文來趨蹌之
衿佩作儀表於薦紳出入容臺振百年之禮樂昭宣
帝制煥大號於乾坤惟其具該博崇深之學所以繼
光明俊偉之倫仰瞻遺像有涕沾巾儻使泉臺之可
作庶幾士俗之還瀉門人具官宋濂拜讚

吳山長像贊

原道書院山長吳履予之異姓弟也人之評履者一則曰履善屬文其嚴簡蘄絕處類秦漢閒人語迫而視之有光淵然也一則曰履自幼沈酣義獻中行草書皆入妙品如寶劔舞空光芒叠發芙蓉出水態有餘妍當與鮮于太常齊驅其得意者或謂過之其知履僅若此至其尙風義赴友朋之急不顧水火雖古人猶難之者未必能知履也因贊之以白履行於世贊曰

若人者其古君子之徒與聞人急難卽欲赴之力縱
不及心懸懸其如饑水火在前幾若弗知輾轉不寐
而長夜以思世滔滔而莫察吾獨探其隱微彼以藝
文爲矜衒者其相知也不亦淺而若人者其古君子
之徒與

石巖凌先生像贊

冰霜顏面鐵石心腸持斧七閩百壬歛藏神明之政
淵源之學其人雖亡清風猶昨

溟滓生贊

有序

溟滓生者盱江廖應淮海學也抱負奇氣好研摩運
世推移及方技諸家學年三十游杭上疏言丁大全
誤國狀大全怒中以法配漢陽軍生荷校行歌出都
門道傍觀者嘖嘖壯之抵漢江濱遇蜀道士杜可大
揖曰子非廖應淮耶生愕然曰道士何自知之大可
曰宇宙大虛一塵爾人生其間爲塵幾何是茫茫者
尙了然心目間矧吾子耶然自邵堯夫以先天學授
王豫天悅天悅死無所授同葬玉枕中未百年而吳
曦叛盜發其冢得皇極經世體要一篇內外觀象數

十篇余賄盜得之今餘五十年數當授子吾俟子亦
久矣乃言於上官脫其籍盡教以冢中書其算絲聲
音起生神鑒穎利可大指畫未到者生已先意逆悟
可大自以爲不及學旣成去隱宣歙間遇余安裕弋
陽將教之安裕勸生業中庸生瞠目厲聲曰俗儒幾
辱吾康節於地下矣復去之杭客賀外史家晝市大
衍數夜沽酒痛飲飲卽吐吐卽飲不醉如泥弗休醉
中嘗大叫曰天非宋天地非宋地柰何柰何語聞賈
似道遣客叩之生曰毋多言浙水西地髮白時是其

祥也似道未解復召至屏人與語生曰明公宜自愛
不久宋鼎移矣似道惡其言掩耳走生亦徑出過曾
淵子家索酒轟飲酒酣作嬰兒啼曰大厦將焚燕猶
呢喃未已耶復賦歌以見意都人士聞之競指以爲
怪民不與接獨太學生熊晞聖猶時造其廬生私執
熊手謂曰吾端居曾樓聞空中戎馬百萬來人鬼作
哭泣聲壬申襄樊陷甲戌宮車晏駕乙亥長江飛渡
似道亦殛死臨漳丙子三宮播遷諸王大臣皆南北
亂走噓吸事耳子不去欲何爲居亡何宋事日非沿

江州郡望風奔潰生大慟曰殺氣又入閩廣中吾不知死所矣遂遁去其言無一不驗後四年病死處州學中年五十二無子唯一義女從之生宗堯夫先天之學頗自謂知易每見諸易師傳疏不問淺深輒訕駁以爲樂及論後天則尊羲畫爲經彖爻繫辭爲傳黜文言彖象二傳爲九師之言且謂說卦非聖筆不能作上下繫乃門人所述序卦直漢儒記爾蓋生聰明絕人未聞道而驟語數故其論經多失中然性使酒難近又好訐人陰私人面頸發赤不顧罕有從其

學者唯國子簿吳浚進士彭復樂師之浚不卒業復
屢受唾斥不怨生將遁時召復至口發例手布籌雖
平昔所靳若終身不示人者一舉授復復後又授鄱
陽傅立云或曰生瀕死語女曰吾死後一月中朝命
山姓烏名使者來徵吾及傅立立當過子門汝可出
藏書示之立當以此致大宮後皆如其言所謂山姓
烏名崔鵬飛也生所著書有元元集歷髓星野指南
象喻統會聲譜畫前妙用數十萬言今猶間傳於世
贊曰

龍圖成章有文從衡以濬以明以洩其藏以奠乎元
黃昔我素王韋編三絕墜緒微茫誰其我綴我參我
腴九師襄之我苞我晶百氏攘之如河之渾如暄而
昏如治絲以棼天未降割一髮攸存維洛有士居於
百原超神沖漠凝於畫先敷往知來小大斯甄莫峻
匪厓我陟其顛莫深匪淵我淪其泉簡材以畀非隱
弗傳有冥者冢卒昭以宣或得其牖載神於言炎炎
宋錄維其訖矣長星蝕柳色之赤矣眚祥見徵土髮
劓矣朋昏以世莫之戚矣魚在在鬻尙其息矣維生

之知中如沸羹彼惛弗知覆謂我狂我狂如何我憂
孔多我山我河我用弗磨俾淪胥以訛我酒旣嘉我
瑟又和我寧不嘯歌北風其涼旂旐央央我車龐龐
蕩蕩江流杭之如陸有腥其穢流血沃沃海氛方殷
其何能目人有恆言風雨漂搖夏宇障之涉於大川
烝徒楫之楫副字橈孑孑焉依國武斯墜不知攸戒
日隕弗升雖晝作夜鴟舞於林鬼瞰於舍孰投是艱
曾莫之艾乃怒乃驚乃瞻乃行乃遯死於冥睠生之
爲胡乃神以著徵之古聖匪程伊度何以言之卒淪

於數一曲之淹不通其故易道既泯數亦不類激贊
於生發我長喟月出皎兮在天之心在天之心何古
何今

余自幼卽見長老談溟滓生事近見李淦性學及
戚光子實所造文又知生爲詳以生之精藝如此
而修采史者不列之方技傳中殊可恨也故予愍
之特序之又傷易道之微激而贊之惜乎予文蕪
陋不能永生也然予情亦至矣濂志

采苓子贊

梁陽鄭仲德有隱操嘗采苓九藍山閒因自號采苓子斯贊之所由作也贊曰

彼采芝者肥遯之士皦皦霞外不容纖滓白月入懷涼颼泝櫺高視一世何慮何營

匡山居士真贊

紫眼有稜足以洞視千古長髯如戟足以畏讐百王或建大將鼓旗而殄殲於妖沴或被處士冠服而容與於雲林可顯可晦載浮載沈壹委順於外物初無累於貞襟縣干尋之丹匡莫踰其峻瀦萬仞之重淵

罔測其深抱忠義之志而耿耿自信所謂不變不改
若百鍊之精金者邪

曾侍郎像贊

身形之瘦弱也則山澤之臞精神之凌厲也則列仙
之儒博極諸書而守之則約智周羣類而處之若愚
當議禮而考文較損益於錙銖稽百王之軌典翼一
代之鴻圖豈非養德之腴造道之樞而爲國之耆艾
邦之著龜者乎

章判官像贊

唐福州軍事判官章公修實檢校太傅仔鈞之父也
其遺像至今蓋四百餘年矣二十世孫御史中丞溢
偶於閩中購得之如獲至寶持以示其友宋濂因爲
作贊贊曰

器局深沈容儀嚴肅吁嗟哲人如金如玉餘慶所被
孫子若雲重珪疊組至今揚芬

四十二代天師張公像贊

含冲葆虛執真之樞翊度宣靈契道之符龍虎衛乎
左右風霆屬於指呼此古之博大真人而今之列仙

之儒者邪

趙使君像贊

宋之王孫元之循吏才優識明政通民治未老而歸
臨難不貳懦夫觀之可以作氣

趙子昂像贊

文運中微頽波日靡公起東南作天一柱天人之表
帝王之孫麟游鳳翔珠明璧溫歷試中外遂居禁密
其名之升與日同出彼儉邪者腐鼠敗豚何能病公
臭穢自聞三百年間西東萬里雄鳴一代如公者幾

公貌如玉公文如金變化莫測照耀古今

李太白像贊

元行臺治書侍御史亦憐真班所藏李太白像係祕閣傳本吾友危君太樸嘗爲之贊自後流落於金陵駱氏酒家洪武己酉秋郡士王宗溥購獲之尋以摹本見貺因造贊曰

長庚降精下爲列仙凌厲日月呼翕風烟錦衣玉顏揮毫帝前氣吞閭豎視若烏鳶頓挫萬象隨機回旋金童來迎絳節翠爐下土穢濁孰堪後先蹶然一笑

騎鯨上天

傅同虛像贊

將求子於外兮則鍊精於三田欲索君於內兮則游
神乎八天是皆窺見夫粗迹而未能暢達其真立高
岑兮谷綿白鶴舞兮蹁躑豈非長跨於洞庭之野吹
瓊管而招飛仙者耶

宜春夏都事遺像

贊以忠字尚之

其才孔良其氣則剛沈潛乎仁義之府嚅嚅乎禮樂
之場窮春秋而寓衮斧法菽粟以爲辭章使之專城

而居則可以攀次公之黃使之入直鑾坡則可追文
成之張胡爲乎低回下列莫展一長託使車以遐覽
竟仙遊於五羊豈詘於人者難知而信於天者不亡
後千百年剛風鬱洶當見騎麒麟而下大荒者耶

元英處土方公遺像贊

予學子方孝孺元英處士之諸孫也持處士像來請
贊贊曰

振騷雅於江南混漁樵於玉笥諫垣天近雖屢形州
牧之童牛衣夜寒終不奪烟霞之志凜然亢直之風

可折詔諛之氣遵眞曜之遺則造元英之私諡唯其
畜厚而發弘所以繼隆而傳熾紳笏蟬聯勲庸赫著
蔓延閩浙之間莫匪雲原之裔敢申贊辭式昭瞻企
王宗普像贊

以子爲貴介公子耶何其神清氣和無綺紈之態也
以子爲仙翁釋氏耶何其與時俯仰遊乎方之內也
以子爲詩人韻士耶何其清奇勁直訥然而謙退也
然則果何爲者耶蓋跡混乎三者之中而心游乎埃
壚之外此吾嘗謂空同子以古之人而處乎今之世

也

危雲林像贊

文繼虞歐之盛位居廊廟之尊天下譽之而不爲喜
眾人毀之而若無聞此公所以爲大雅之君子傳百
世而長存者乎

王指揮像贊

真人龍興山川降精仗劍來從莫非豪英維時王公
實將家子虎吼鷹揚萬夫披靡成功錫爵遂鎮一方
弛其武威佩玉冠裳何以觀之有煒其像益懋厥勛

配古良將

蘇都事伯夔像贊

子由後
平仲父

才足以行志智足以成事也苟盡施於時必有大過
於人而得位以行者僅出其一二也年齒之高林泉
之趣皆公之所宜有固天報善人之所致也惟有子
之甚賢以文鳴於治世足以繼絕學於前人揚休聞
於不墜也此吾嘗私爲之善誦長公之言擬公於晁
氏之君成而知其無愧也

自題畫像贊

廣陵孫生貌予真人皆失笑謂無不似者因題其右
辭曰

似柔而強如愚而明辨駁百氏寤寐羣經千載之長
一世之短前武儼然吾敢不踐

又

吾心與天地同大吾性與聖賢同貴柰之何隨於曲
學局乎文藝忘其真實之歸溺此浮華之麗顛墜於
得喪之塗眩惑於是非之際縱濫廁於大方曾不離
夫小智靜言思之幾欲賈涕奮自今以爲始曰載惕

而再厲有如升嶽者當極於崇巔辟若改火者須資
夫新燧期融通於高朗誓疇治其蕪穢用致知爲進
學之方藉持敬爲涵養之地續墜緒之茫茫昭遺經
之晰晰雖任重道遠必篤行而深詣庶幾七尺之軀
不負兩閒之愧爾其勉旃以終厥志

越國夫人練氏像贊

有序

天地之大德曰生夫生者乃天地之心雖陰陽之所
運行有開闔慘舒之不齊然天地之心生生而弗息
者恆循環於無窮有如碩果不食則其生道已具其

中俟時發榮挺然而莫之遏矣時至五代用兵爭強
屠戮逮乎雞犬是天下極亂之時蓋無復人道有能
於其閒不爲氣運之所變遷而一念之仁有以契夫
生生不息之心則其感召之速所以數遺於後人者
其澤曷有旣哉閩之練夫人諱雋建州刺史章公仔
釣之妻也生而肉髮深沈而端毅終日或不一笑言
且知識有絕人者時閩王命公屯兵浦城之西巖南
唐盧將軍帥師來侵我公遣二校請師於州失期將
斬之夫人勸曰時危民未靖公柰何斬壯士公悟不

問二校逸入南唐皆爲大將一則金陵邊鎬一則上元王建封也保大三年二月南唐遣江西撫安使查文徵伐閩取建州鎬爲行軍招討建封爲先鋒橋道使奪其險要已而建封焚外郭八月甲子克之公歿已久獨夫人猶存二校遣使者持金帛遺夫人并以一白旗授之曰吾且屠城夫人宜植旗於門吾已戒士卒勿犯矣夫人反其金帛并旗弗受曰君幸思舊德願全此城必欲屠之吾家與眾俱死耳不能獨生也二校感其言遂止夫人之子一十五人孫六十八

人多躋顯仕而其後人繩繩相繼位宰執登法從歷
卿監佩守令之章者殆百餘人嗚呼何其盛哉非夫
人有以契夫天地生生不息之心則其施報之厚未
必若此之至也原夫人之心渾廓昭融不限封域視
一城之生聚不翅如一家真有所謂仁者之量歟慶
以類大易之旨也夫人之後其有不蕃昌者乎其有
不絢著者乎昧者不知天之未定謂爲善無足倚是
則天之生生之道絕矣夫奚可哉夫人二十世孫存
道以遺像求予贊予旣質諸傳記以序夫人之事而

復爲之贊曰

懿彼夫人生於七閩肉髮有倫靜毅而莊動循厥常
女士之良笄而有歸建州之妻其德與齊建州桓桓
旗旄繚繚以扼建關將固我城必集我兵移書以徵
二校言旋何期之愆絕首以懸夫人曰吁乾坤創夷
壯士勿誅逸之使奔遂爲唐臣建旆而軍爭城以攻
火旗晝紅陷其四封二校有云使鬼爲人夫人之仁
曷其報之曷橐我私曷授我旗旗植於家有突而譁
我劍之加夫人曰吁是城卒屠我生何爲有眾若林

昔而斧礮今而謳吟夫人之亡其魄已藏其澤愈滂
傳紫襲龜霧滃雲迷被於今茲遺像儼然萬目斯瞻
曷取則焉

黃氏三壽圖贊

浦陽合
溪人

資善

身安而家裕者人之所欲也藏智不用而厚重有餘
者天之所福也君有以契乎天故不求而自足也超
乎寵辱離乎毀譽而游乎物表此人之所難能而君
之所獨也

資深

智足以燭理而加之好學敏足以蒞事而本於無私
事長不以和樂勝禮馭下不以慈惠傷威行乎家庭
春溫而秋肅著乎言行方矩而圓規斯學者之所難
能苟謂之篤行君子其孰以爲非耶

資文

人知其外之偉而不知其內之美知其才之豐而不
知行之崇是蓋質而不二和而有禮介而能通者也

龍馬贊 有序

西南域自昔出良馬而產於羅鬼國者尤良或云羅
鬼疑卽古之鬼方其地有養龍阬在兩山之中泓渟
齋深開闔靈氣而蛟龍實藏其下當春日始和物情
酣鬯土人立柳阬畔擇牝馬之貞者繫之已而雲霧
晦冥咫尺不能辨色類有物蜿蜒上與馬接蓋龍云
逮天色開霽視馬傍之沙有龍跡者則與龍遇謹其
芻葭而節宣之暨產必獲龍駒焉粵若洪武四年六
月壬寅夏國主明昇以全蜀降獻良馬凡十而其一
色正白乃得之於阬者身長十有一尺首高九尺足

之高比首而殺其二尺有肉隱起項下約厚五分廣三寸餘貫膺絡腹至尾間而止精彩明晃振鬣一鳴萬馬爲之辟易韉勒不可近近輒作人立而吼上謂天旣生此英物必有神以司之親撰祝策詔有司以牲牢祀於馬祖然後勅典牧副使臣高敬囊沙四百斤壓之人跨囊上使其游行苑中久之性漸柔馴適八月癸巳上將行夕月之禮於清涼山壇上於是乘之而出如躡雲而馳一塵弗驚皇情悅豫賜其名爲飛越峯復命御用監直長臣馬晉臣繪其真形藏焉

臣濂稽諸載籍漢之元鼎中有神馬出渥洼水中馬
之生於水者尙矣養龍之說雖相傳於外國要當可
徵不誣也肆惟皇上以大德而位大寶日之所出日
之所沒無不梯山航海獻費奉琛邇者獨角之犀來
自九真食火之雞貢於三佛齊之境其他侷形僞狀
藉藉紛紛且不一而足而況茲水產之龍馬乎周書
有云不寶遠物則遠人格所寶惟賢則邇人安皇上
宵衣旰食日懷保於小民巖穴之士蒐羅殆盡將圖
治安如黃虞時其遐荒殊裔珍毓奇產未嘗有心求

之所以榮光休氣洋溢中國仁聲義聞充洽八表而
龍媒之異自致於天閑十二之中揆之於書前聖後
聖蓋同一軌轍也其視貳師之遭黷武窮兵以索諸
大宛者果爲何如哉臣濂以文字爲職業際茲盛美
不敢默而無言謹述贊辭一首以貽諸後世贊曰
天駟熒蛟龍升靈泓澄神馬生祥飈瑞靄晝杳冥天
一翕聚通精靈龍胡盈鳧臆輕竹披耳鏡懸睛花雪
捲毛光照夜汗溝有血霞流頰振鬣鳴萬馬驚閃流
電逐飛星九霄彷彿從龍行但聞瀟瀟風雨聲三川

平八極寧真龍媒獻龍廷出入天門駕龍駟太霞五
彩滿瑶京皇風清皇道貞皇威明茫茫堪輿內孰敢
不來庭陋彼漢將軍空圍貳師城乃知天子在樹德
不必連年徒用兵

墨鞠圖贊

建安蘇照爲學子黃叔暘作墨鞠圖侑之以竹石豈
以其氣節之相同歟禁林散吏宋濂爲造贊曰

我本中黃鐵爲肺腸精神外章不自知形貌之黝歟
綠竹猗猗白石嗟嗟貞而匪阿斯爲月下之友歟萬

色齊冥洞察物情雖暗而明豈陶令沈昏而託之酒
歟

陳方都督像贊

桓桓俊英矯矯虎臣心雄萬夫才佚三軍爵列崇階
功在盟府圖像雲臺流芳千古

李徵君像贊

嗜義親賢以道自娛懿哉若人君子之儒

虎林處士贊

虎林處士王君
年踰七十而視聽如少壯時其

孫監察御史驥從予受經者久間來請贊贊曰
素髮垂垂中心熙熙儉勤作肥家之本嚴厲爲馭眾
之基好施之仁久而彌篤嫉惡之氣老而不衰吹鳳
簫於明月之夜飛羽觴於百花之時大布寬衣容與
委蛇不知者謬稱虎林處士知之者以爲瓊臺之神
仙乎而

華嚴經贊

有序

上人幻滅嚴持梵行欲求無上真如之道嘗自念言
華嚴大經實中天調御第一時所說一乘頓教化爲

尊勝欲燕松爲煤人以香藥搗和成劑以書此經而
彼松煤者假物所就具黑暗相有染白法欲煨汞爲
丹承以空露研潤如法以書此經而彼汞丹者炫燿
可觀能育人自非勛道者欲推赤金素銀廉薄如紙
復粉爲涯以書此經而彼金若銀雖曰重寶外塵爲
體初不自內以是思惟身外諸物若勝若劣若非勝
非劣若一若多若非一非多皆不足以稱此殊利繼
我一身內而心膺肺肝外而毛髮膚爪資血以生資
血以成資血以長資血以至壯老暨死是則諸血眾

生甚愛如梵摩尼一滴之微莫肯捨者我今誓發弘
願於世尊前以所難捨而作佛事從十指端刺出鮮
丹盛於清淨器中養以溫火澄去白液取其真純蘸
以霜毫志心繕寫滿八十卷尊閣益壽禪居昔者樂
法比丘當無物時欲聞佛語了不能得乃信婆羅門
言以皮爲紙以骨爲華以血爲墨願書一偈況今百
千妙頌十萬正文不止於一縱捐軀命以報佛恩無
足爲異於血何吝唯願法界有情或見或聞證入雜
華藏海證入雜華藏海已卽得六根清淨得六根清

淨已卽得自性清淨得自性清淨已卽得四天下微
塵刹土中一切眾生皆悉清淨無相居士未出母胎
母夢異僧手寫是經來謂母曰吾乃求明延壽宜假
一室以終此卷母夢覺已居士卽生今逢勝因頓憶
前事於是親熇五分妙香香雲輪困結爲寶網徧覆
經上乃復合爪向佛散華作禮而稱贊曰

雜華淨智海九會之所說一音所演唱十處放光明
信解行證門總攝無復餘如是具五周如是辨六相
如是分十元妙義皆充足以至四法界二十重華藏

無邊香水海教條有差別性相了無礙圓融與行布
非異亦非同一可爲無量無量亦爲一重重無有盡
是爲功德聚如來最上乘龍宮所秘藏上人出身血
嚴飭書此經於一滴中中普含十方界於一一界中
普現光明臺於一一臺中普成獅子座於一一座中
普見分身佛如上無數佛皆具大威德眉間白毫光
徧滿一切處其宣大乘法聞者應解脫譬如日月生
照三千大千悉見種種色法能破暗故譬如大汪洋
波平乃如掌無丘陵堆阜法能平等故譬如陽春至

大地盡發生諸根各萌芽法能霑溉故譬如梵志夢
一夢千劫事不過刹那門法能融攝故譬如子憶母
未見心已至形神皆兩忘法能無離故譬如黃金色
金色不相分金亡卽色空法能不二故譬如石性堅
初不從外得石性自圓滿法無修證故能如斯見解
見經不見血若加精進力見佛不見經及至成道已
見性不見佛我性如虛空了無能見者無見中有見
全體卽呈露苟執於所見亦非我本性見見二俱泯
此爲真見見真見復何有性本無物故一心歸命禮

祇夜以爲贊諸妙樓閣門彈指一時啓

大還龍虎丹贊

有序

龍虎丹贊爲予友鄭源氏作源因讀金碧古文龍虎
上經有悟大還之旨用之修練節節有奇驗復以其
圓祕也請予白之作是贊贊凡四章

苞乾靈一

人身苞精氣妙與元化并一神管攝之鉛汞各流行
神所棲止處實爲天地中闔闢類兩扉循環不竭窮
廓然含沖虛獨立不以形是卽真息根強名帝乙庭

靜極必自顯內境垂白芒或想爲連環無乃喪其常

斡化紐二

凝神入紫虛沖然抱一居青龍鬱上升白虎爲熬樞
牝牡旣相從蒸潤如流酥鄴鄂一以固溫養成子珠
銷霄離中陰坎陽復來隨純剛號爲乾潛躍契道符
鬱羅蕭臺中服霞漱雲腴閱歷無窮年永共溟滓俱

考火記三

鼎爐乾坤樞匡郭水火魂戊己居土官一氣中夜存
火候十二時暮蒙復朝屯專氣而致柔綿綿日相因

刑德務並進文武須錯陳薰蒸洽太和天機益神津
三元與王氣一一返其根後天不能彫長爲萬象尊

稽曲徵四

三千六百門盡隨魑魍場雌雄鑄爲劍日月吸光晶
尾間閉元液九鼎運女英三遜及五假八石巧煎烹
如此之舉措難可一二名陰魔奪人命遺屍莽縱橫
寒飈動羅艷時有鬼嘯聲方知涉有爲不可學長生

觀音石贊

虎林翁君祥卿得圓石一大可五六寸上現圓通大

士妙巖寶相坐寶蓮華善財童子合爪侍側蓋大士
住不可思議解脫門能以神變作諸佛事攝受眾生
大則示化真身於陀怛洛迦山小則寄影像於一木
一石不假人爲自然天造無非自慈愍中發現祥卿
因請濂作贊以顯神功以示闡提生我慢者贊曰
元黃旣肇分白石卽受質斯時未有佛云何能應現
千劫皆佛化難以時節拘劫初與劫終常居寂光土
石本無情物其頑無與等初無感通者云何佛示像
微塵刹土中塵塵皆是佛有情與無情本來同一體

諸佛亦無數動曰那由他云何圓通佛獨此示神變
圓通於支那夙有大因緣所以不會捨如母之憶子
如來談諸相皆是虛妄集云何自着相曷以釋迷網
由相以悟性正如指指月見月指則忘寧有繫執故
以此四者觀唯知佛願弘聖凡盡融攝調御菩提心
假石顯云異超出思慮表既非圖繪力又匪鐫勒功
幻成妙嚴相七寶作瓔珞瞋目結跏坐正以慈愍故
用警闡提者徒爾增我慢當知神通力乃復有斯事
始悔未見時口出不淨語如仰首唾天唾還着面故

愚癡誠可念寧忝加斥逐我願大地人無不知三依
見石非見石見佛亦非佛但見無量光各自心中發
徧照十方界明如日月燈十方諸品類盡得諸佛智

宋學士全集卷之三十一

明宋濂撰 同郡後學胡鳳丹月樵校梓

琴操

飛泉操

浦陽元麓山有飛泉濂與鄭源先生數觀之造飛泉
操鼓之琴書諸崖石其辭曰

飛泉兮瀏瀏洗耳固非兮誰飲我牛覆謂我污兮移
彼上流具人之形兮奈何忘人之憂

琴操二首

余將有遠行道過雙溪之上中心隱憂未能釋去逢
友琴生於麗澤精舍乃製穹霞洞林二操使彈之流
宮含徵其聲泠泠然恍如坐青蘿山中時也生亦清
俊士哉其辭曰

有穹者霞其色楚楚朝宜弋於林暮汕於渚役車駸
駸胡弗之休視波江水彭然東流 右穹霞操

有洞者林其色陰陰可以樂饑可以洗心中有白雲
藹其承宇我親之思我心之苦 右洞林操

含山操二解

有序

含山操者爲和陽王綱妻吳貞媛作貞媛遭兵亂乃
能完節蹈水死其不有繫民經之大者乎辭曰

含山有雲莫蔽我衣彼荷戟者迫我以馳我馳我驅
泣涕如雨仰視白日光不照下叶地不可穴天不可
緣舍旃舍旃我尙何言

含山有石其光差差石或可轉我節可虧我夫何之
欲從無所舍彼黃泉無相見者叶誰謂淵深我視若
陵我死得死中心之寧

琴操二首

客有吏於海東者以能擊貪暴聞然終用是受誣嘔
血死予友胡徵君爲著哀辭一通予讀之甚悲竊取
其意作哀海東傷妖女二操使善琴者彈而和之客
之鬼或有知則其鬱鬱之氣庶幾少伸矣乎辭曰

我哀東海而思之苦彼何人斯猛噬如虎我不擊之
我民之憂縱不我與覆以我爲仇蒼天雖高寃其有
極非血之嘔曷明心赤泱泱大風沈沈寒泉舍旃舍
旃我尙何言

右哀海東

有妖者女顏如舜英詆我以醜我其何傷眩白爲黑

古亦多有自尤不遑敢誰之咎黃鵠飛來其音閭閻
我心苟安何戚弗欣天上地下命也奈何命也奈何
焉知其他

右傷嫉女

鼓吹曲 王國祀仁祖廟樂章

迎神奏瀉和之曲

皇圖聿崇茅社受封禮分雖異孝思則同緬懷世德
源深流鴻報本有祀式昭神功

奉牲奏慶賀之曲

王國之東清廟翼翼奉我皇祖享祀弗忒薦以牲牲

敢曰充臚神 六迪嘗純嘏是錫

初獻奏保和之曲 之舞

皇祖載德既濟巨仁弗耀其身委祉後人睠茲藩服
典祀維寅清醴方薦歆其苾芬

亞獻奏清和之曲 之舞

穆穆靈宮庭燎有煒貳觴載升神其樂止其樂伊何
錫我繁祉磐石之宗本支百世

終獻奏成和之曲 之舞

神兮下臨陟降在庭不見其形如聞其聲冷風肅然

達於兩楹禮成三終神保攸寧

飲福奏咸和之曲

神具醉止威儀孔肅曰爾孝孫來飲爾福介爾眉壽
膺爾百祿子孫保之以引以續

徹豆奏嘉和之曲

禮備樂舉祀事攸宜孰其尸之廢徹不遲皇哉神惠
覃及我私靈氛將逝如何勿思

送神奏德和之曲

杳兮忽兮神運無迹鸞馭上征星流飈疾其靈在天

其主在室億萬斯年孝思無斁

宋饒歌鼓吹曲

臣聞真人應運而起旋陰轉陽協和神人剗革僭僞
期底隆平於時五季之亂已極光嶽氣分河海怒溢
強臣悍將割土分疆擅執節鉞倒持天柄敢拒帝命
莫之敢制我太祖躬屬橐鞬奉命四征赫聲濯靈所
向輒克姦惡授首獻於太廟已而大功旣茂天命攸
歸乃受周禪卽皇帝位璽書誕頒天日昭煥凡厥臣
庶莫不翹足延頸以俟太平皇帝若曰皇天旣畀我

有家朕夙夜曷敢荒寧彼螢爝之微僅若一髮欲抗
明於日月疇能置諸朕當翦其孽芽毋使滋蔓爾有
衆尙克協乃心以底天之罰越建隆元年夏五月丁
巳上親征澤潞六月辛巳克其城李筠赴火死冬十
月丁亥又親征淮南十一月丁未薄其城未幾拔之
李重進亦赴火死乾德元年春二月高繼沖遣客將
王昭濟奉表稱臣而荆南平三月壬戌王師入朗州
獲周保權以歸而湖湘又平三年春正月取劍州蜀
主孟昶封府庫以降開寶三年秋九月己亥朔伐南

漢四年春正月辛未次白田其主劉鋹素服出降七年冬十月王師伐南唐八年冬十一月乙未李煜奉表納降由是天威所加如雷如霆有觸之者靡不殞滅太祖既棄羣臣上游帝所太宗嗣厥大寶駿惠前烈文綏武戡唯日不足太平興國三年夏四月己卯平海節度使陳洪進以漳泉二州獻五月吳越王錢俶復盡獻其國所有地四年春二月甲子上親征太原夏五月甲申北漢主劉繼元率其官屬銜璧入朝自是海內羣雄皆爲臣僕風氣宣通罔有限域東西

幅員盈三萬里梯山航海獻賚奉琛委蛇而來上實
天府戴白之叟垂髻之童皞皞熙熙莫知帝力於是
宋興至是已二十年矣臣惟帝王之興自有貞符歷
古以來史不絕書我太祖之生也祥光瑞彩流爲精
英異芳幽馥鬱爲神氣所居之地紫氣隨之建纛而
出白日爲暈是蓋上天著厥嘉貺以流耿光於無窮
故自唐虞禪受之後鮮不以征誅而得天下其中豈
無揖遜而紹位者皆陽予陰奪尋卽廢之惟我太祖
應乎天而順乎人陳橋之戴黃衣之加蓋迫於甚不

得已爾由是能大一統臣服四海用作神主聖德神
功巍巍堂堂傳至孫子億萬斯年跨漢唐而追三代
何其盛哉然而短蕭鐃歌黃帝岐伯所以建威揚德
風勸敵士者也周制因之其在大司樂則王師大獻
乃令奏愷樂在大司馬若師有功則愷樂獻於社大
抵皆軍樂也古樂久已亡失至漢有朱鷺等十二曲
列於鼓吹謂之鐃歌今尙可考見自時厥後代有其
辭而唐柳宗元獨準漢曲倣其篇數作鼓吹鐃歌以
紀高祖太宗功德及征伐勤勞之事臣雖不佞自幼

以文字爲職輒取法漢唐窮思畢精作爲歌辭以侑
戎樂治兵振旅之際得於馬上奏之焜耀鏗鉤震撼
無際使有宋之成烈增光於後無讓於前臣死且不
朽臣謹冒死上

太祖生洛陽甲馬營中神光滿室有香郁然經
宿不散此聖徵先見者也爲啟聖徵第一

啟聖徵兆載先炎精降爛以鮮破重陰燭層元合之
暢神必宣應昌期馭宰權天序叶地軌甄星游渚白
帝延氣貫月永殷年質往牒無不然惟皇符熾且騫

著成烈在不刊

右啓聖徵曲凡二十二句句三字

太祖將北伐師次陳橋驛諸將以黃袍加上身
列拜庭中稱萬歲遂詣崇元殿行禪代禮爲受

周禪第二

受周禪崇靈基飛龍在天黃道開躬握乾衡鎮坤機
蒼精喪木無支黑光盪日見重輝天人同歷數歸靈
承帝祐流鴻滋嘉瑞章紛若敦神爵集肉角來氓灑
灑俗恢恢昭皇威時赫戲

右受周禪曲凡二十二句其十八句句三字
四句句四字

昭義節度使李筠據澤潞弗服上御六師平之
爲斲老雄第三

斲老雄雄勢蹙連寇師樹高燾襲邊城施蠱毒王赫
斯怒誓如戮百萬貔貅若林蠹行視巉嶢勝平陸升
城齊呼山嶽覆飛矢貫臂拔其鏃雄斯窮畀炎焞朱
鳥鳴反舌縮反舌縮四海服

右斲老雄曲凡二十二句其十七句句三字

五句句四字

淮南節度使李重進不庭憑恃江淮招集亡命

上親討之為長淮沸第四

長淮沸沸若湯有蛟下潛石作房腥沫旁灑矛距四
張欲鼓孽浪浸日光真龍出火鬣明炳暴髓焦毒吮
殲厥凶醜如刺狼水安流若鏡平皇威洽濺滂建萬
萬慶無疆

右長淮沸曲凡二十句其十五句句三字五

句句四字

上遣將討張文表假道荆南其主高繼沖懼奉
表稱臣爲耀靈威第五

耀靈威奄八寅如山壓卵颺噓塵大帥率師手握瑾

渠巾切策馬飲江江水渾盪摩日月搖星辰孰敢奸

命馘以狗蠻荆輿櫬稱妾臣翦拜柯條別其根一朝

坐鎮百粵門南荒帖帖絕妖氛

右耀靈威曲凡二十句其十一句句三字九

句句四字

師克南平趨朗州武安節度使周保權拒命討

獲之為鷹之揚第六

我鷹之揚於彼南楚目城無全尙何有險阻
周愾愾曾莫構思仇孽既殄胡反噬我師
梟騎厲華旄旋海水立霄旭昏殺氣回薄
翳若烟濯征斯克功無前王度遠引靡不肩

右鷹之揚曲凡十八句其七句句三字九句

句四字二句句五字

諸將伐蜀取劍州蜀主孟昶封府庫請降為巴

蜀平第七

惟彼巴蜀務靡麗以夸金塊珠礫納政於邪於鑠王
師如虎如彪捕夷凶族使民氣以攄足不加首臂豈
大於股啓關迎降崩角無敢後聲明宣流被區有百
蠻來同孚至理上鄰三五皇德羨且阜

右巴蜀平曲凡十八句其二句句三字十一
句句四字五句句五字

南漢劉鋹據嶺南良將征之鋹教象爲陣以禦
我集勁弩射之奔鋹遂詣轅門降爲象斯奔第

八

象斯奔擴南燭開重昏揭兩曜通粵海接閩徼象初
弗知跳跟以戲敢持厥馘雛鬪與隼俱力索氣銷始
就縛三早凱旋奏戎樂威神出自天顯彼帝畧千秋
萬年蒸庶和且延

右象斯奔曲凡十八句句其八句句三字七句
句四字三句句五字

王師伐江南江南主李煜降時彗出柳歷輿兒
爲彗出柳第九

維彗出柳六合布新矧此彈丸何敢不臣弼弓宛轉

鐵騎參潭天塹未度已無江塹帝詔將臣俟其來賓
慎毋疾擊以病吾民長蛇成圍不異祥麟虜王旣降
市無驚塵大宣皇化覃於至仁

右彗出柳曲凡十八句句四字

太宗旣繼大統平海節度使陳洪進獻漳泉二
州爲拓閩關第十

閩關屹南紀上應牛女星南將窺瘴海東或帶滄溟
五季失羈御藩鎮擅甲兵太阿旣倒持僭竊瀆恆經
誰歟據二州於此建節旌予奪自己出況復望來庭

太宗嗣寶符渙號風霆行稽首歸厥命覆冒仰王靈
鞮譯通絕域珪贄集明廷神猷杳難測穆穆臻泰清
右拓閩關曲凡二十句句五字

吳越王錢俶見上威德日盛盡獻其土地爲吳

越歸第十一

皇王握神契重華叶帝暮神兵從天下歛忽千萬餘
揮戈日爲回投鞭海成枯奮擊八極閒徼疾飛電如
錢氏最先覺方物久內輸終知喬嶽尊上阜欲何須
登民獻天府不煩神戈誅帝德統罔極萬國混車書

右吳越歸曲凡十六句句五字

海內咸臣唯北漢假息湯釜上親征之其主劉
繼元素服紗帽待罪臺下詔釋之爲克戎逋第
十二

汾晉十萬甲數葉僭爲君蟠根欲弗拔毒虐我蒸民
聖人攄武師威烈赫然振刀戟夜生火出入動若神
方將藏下地咎已凌高旻有城皆作醢無甲不爲塵
戎逋膽已落舉族悉來臣羣氓如流魚挈置瀛海津
自茲遂生育陶然履太涓阪泉著軒德母浦明堯勛

赫赫炎德殷永世同不泯

右克戎逋曲凡二十二句句五字

四言古詩

風樹亭詩

有序

風樹亭者嘉禾潘孝子之所建也孝子之親歿每對人言輒嗚咽流涕然無以寓其罔極之思取韓詩外傳樹欲靜而風不止之言表其墓亭嗚呼孝子之意至是爲可悲矣夫人孰不欲養其親親則不予待也所以昔者皋魚立泣而死者孔子蓋傷之也憫之也

以其志爲可悲而無所用其力也嗚呼若孝子者念
念不忘乎茲其亦知沒齒慕親之道哉爲之詩曰
山有嘉樹油然發榮豈不欲靜風撓之嗚我思我親
顏貌日改子欲養之親不子待嗚呼噫噉我懷孔悲
山高海深孰堪喻之內而九藏外而四體皆親之枝
同一根柢根旣撥矣而枝獨存夙夜哀號莫達九原
白楊瀟瀟泉扃夜闕我親我思得無顛顛親不可見
音容是求求之不得血淚交流作亭墓隅是曰風樹
仰之瞻之心焉孔瘁

右詩八章章四句

靈槐詩

有序

四明史氏貴富光榮與南宋相終始非特人事也蓋
有天道焉元有國百年史氏以忠信文學稱於時者
甚眾而祿位弗稱人事不宜然也是亦有天道焉元
季兵亂槐生於史氏之庭史氏里人曰是必有異既
而槐死於馬里人又曰是必有異未幾槐果復生南
園中里人曰前之異者徵已往後之異者將來徵之
史氏殆有顯者乎入國朝史氏諸孫靖可以才見推

爲中書舍人出爲泰州守遷肇慶通判前之言者曰
是其徵矣然而未也遂相與字槐曰靈槐而歌咏之
靖可嘗與余兒璫同官謂余宜賦詩嗚呼天人之際
遠矣觀於史氏又何其著明哉詩曰

難諶惟帝厥命孔赫鑒於九有顯相有德先宋九君
旣南而微微不遂傾世臣毗之世臣之家鄧山之下
歲時來歸旗節車馬馮軾而趨袞衣珮璜其綬伊何
將相之章雄城渠渠黎庶如雨相臣戾止耄倪咸喜
豈無公侯孰能後昆三相二王國存與存誰其尸之

其德有始既受多祐又有孫子鉅海湯湯朔風荒荒
不淪於危不顯其光孰云菑播而不有穫天將昌之
嘉徵允灼崇堂有庭其左有槐匪植而生惟德是培
天實培之或戕於人人力雖勞其能勝天南園嚙嚙
有萌斯孽其本如達靡有摧害始軋而卑忽拔而穹
其兆斯何宜卿宜公明明天子俊乂是使矧茲世家
王公之嗣嗟爾君子天休汝膺何以占之靈槐在庭

贈闕希曾參政山東詩

并序

國朝以魏晉以來立行臺省於外蓋爲征討權宜之

許至唐末方鎮擅地遂以中書令同平章事命之至
今相沿而不革非所以示悠久乃改爲承宣布政使
司設使一人左右參政各一人以協和庶政統馭人
民河南岡希曾由鄉貢進士擢爲起居注皇上愛其
才俊俾肄業文華堂堂在禁中車駕時幸臨訓飭之
尋除監察御史轉司文監令乃授山東承宣布政司
左參政希曾名鈍仕學兩優者也因其嘗受經於予
故其行也詩以贈之其詞曰

山東鉅藩統府惟六民物阜蕃土地饒沃宸衷軫之

百司綦布誰挈其綱政乃無斁乃詔近臣爾鈍爾往
宣朕至懷參佐其長臣鈍曰吁臣恐弗勝方嶽重鎮
厥任匪輕帝曰俞哉爾毋固辭精白一心力行無疑
鈍拜稽首卽日啓行君臣一心共底隆平我知闔子
有學有文五色煌然出類超羣子之往矣其建功勲
佇見政績邁於古人古人有云盡瘁國事子尙勉旃
服之毋忒

五言古詩

雜體五首